



## 林鄭去日本 撐香港長衫展

特首林鄭月娥鍾意著長衫，唔同活動上都見過佢穿著，下星期去日本訪問嘅佢，會趁機喺東京參觀由香港藝術中心舉辦嘅長衫展覽。該展覽名為「混搭之時尚：當代長衫珍藏」，係東京「香港周」活動之一，11月3至11日喺涉谷舉辦，展出10名本地時裝設計師嘅作品，以推介香港文化藝術及創意產業，同時促進兩地文化交流。林鄭仲喺 facebook 出帖幫手宣傳，話到時親身參觀之餘，仲會同各設計師見面同打氣。

其實香港中式長衫被列為非物質文化遺產項目，製作精細，融合東西方設計特色，展現香港獨特風格，兼容傳統及創新意念。今次參展嘅全部係知名設計師，包括林春菊、郭翠華、黃慧霞等。3人接受政府新聞網訪問介紹設計理念同包含嘅信息，好似林春菊嘅作品就以牛仔布製作，盼令長衫更貼地，又希望日本人透過長衫嘅工藝了解中國文化。



參展設計師之一嘅林春菊話，好多人覺得長衫老套，所以希望帶新鮮感畀大家，今次帶去日本嘅作品就以平民嘅牛仔布料拼合而成，寓意將唔同年代結合，希望「貼地」嘅設計可吸引年輕一族，有利傳承。

(政府新聞網)